

Examinà la purschida publicistica da RTR

Sesida dal Cussegl dal public SRG.R

■ (cc) **A chaschun da sia ultima sesida ha il Cussegl dal public SRG.R tractà la purschida publicistica da RTR en connex cun las elecziuns naziunalas 2011. Sper las emissiuns da radio e televisiun ha il cussegl er observà la purschida sin www.rtr.ch. Il Cussegl dal public fa in facit positiv e lauda la vasta e seriusa lavur da RTR.** Grazia a la collavuraziun interregionala da la SRG SSR ha RTR gè la pussaivladad da realisar pliras emissiuns da televisiun per las elecziuns naziunalas 2011. Quai particularmain en cumbinaziun cun il project convergent «Treffpunkt Bundesplatz – Sentupada piazza federala» da la SRG SSR. L'offerta da programs è stada vasta ed ha persvadì en tut ils formats d'emissiun. RTR ha emess contribuziuns variadas ed interessantas en il Telesguard, Minisguard, Cuntrasts e Controvers. Er per las moderaziuns dat il Cussegl dal public bunas notas. Las contribuziuns per il Radio Rumantsch han persvadì. Sulettamain l'emissiun satirica dad *Arno Camenisch* n'ha betg propi plaschi a tuts. Las discussiuns cun politichers giuvens perencunter èn stadas frestgas e na repetivan betg mo las parolas da las partidas.

La pagina d'internet rtr.ch ha infurmà detagliadamain davart las elecziuns naziunalas 2011. Malgrà che la navigaziun en il dossier era plitost cumplitgada era quel la funtauna primara per las infurmaziuns actualas e da basa. La pagina d'internet è stada frequentada per in tant dapli che usità. Tut las candidatas ed ils candidats èn vegnids preschentads. Medemamain ha RTR resguardà commensuradamain e fair tut las partidas cun lur candidatas e candidats. Il cussegl constatescha che RTR ha era tegnì quint en sia lavur da la situaziun linguistica en il Grischun, uschia p. ex. cun translaziuns simultanas tar discussiuns u rundas da discussiun.

Per pudair porscher al public avant las elecziuns ed il di da las elecziuns 2011 infurmaziuns cumplessivas ha RTR elavurà in concept fitg detaglià. L'entira palletta da la purschida ha persvadì.

La proxima sesida dal Cussegl dal public SRG.R ha lieu il favrer 2012. A chaschun da questa seduta vegn discutà davart las novas emissiuns da la Televisiun Rumantscha e la nova structura da program dal Radio Rumantsch che vegn emess a partir dals 30 da schaner 2012.